



partii naleraq

Nuuk, Oktobarip 11-t 2017.

UKA 2017/125

**Kalaallit Nunatta pigisaannik sillimmasiisarfirmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piumasaqaatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut.**

(Inatsisartunut ilaasortaq, Anthon Frederiksen, Partii Naleraq).

Partii Naleraq sinnerlugu siunnersuuteqartoq Anthon Frederiksen siunnersuutip oqaaseqarfigingilaataa qujaffigerusupparput siunnersuutaanut, imatullu oqaaseqarfigalugu.

Ukiuni arlersuni tungitsinniit eqqartortuakkatta ilagivaat nunatsinni, minnerunngitsumik Naalagaaffinngoriartornerup aqqani, aammali, nunat allat suli Naalagaaffiunngikkaluartulluunniit assersuutigalugu Savalimmiut assigalugit, aningaasaqarnermut sectoreqalernissamik ujartuisuaratta. Tassuunami qulakkeerseqartarmat aningaasat nunagisamiit aniaannaratik nunap iluani sulinissaat anneruumik qulakkeerseqartarmat.

Aningaasamut sectori ukunanga minnerpaamik imaqartarpoq:

- Aningaaserivik
- Sillimmasiisarfik
- Utoqqalinersiaqarnermi aningaasaateqarfik
- Pappilissat nalillit

Uanilu siunnersuummi anguneqartussanngorpoq nammineq sillimmasiisarfeqarnissap misissugarinissaa nunatsinni pigisatsinnik.

Pisortat pisortallu pigisaanni sillimmasiisarneq qiviaannaraanni miliuunerpassuit atorneqartarput pigisanut sillimmasiinermut namminerlu pigisaqannginnitta kingunerisarpaa aningasat miliuunilipassuit kuussuartut upernaami supisutut nunatsinniit “suleqqaratik” aniaannartarmata uggor-narluinnartumik. Taakkuinnaalluunniit ersersippaat misissuisoqartariaqanngikkaluartorluunniit pisariaqartitsineq annertungaarmat, taamaattorli siunnersuuteqartup kissaataa anguniagaalu malillugit alloriarnertut siullertut tamanna akuersaarnartipparput, nalunnginnatsigumi aamma siunnersuu-



## partii naleraq

teqartoq pilersitsinissaq angutikkusukkaa, aammami kisitsisit takutereerpaat imminut akilersinnaalluortoq pilersitsinissaq, pisortat pisortallu pigisaat taakkuinnaalluunniit eqqarsaatigalugit.

Taakkuunnaangillat aamma nunatsinni pigisat nalillit amerlangaatsiarput, nunattalu avataaneersunik sillimmasiisarfinnik annertuumik iluaqtigineqarlutik “sillimmaserneqartartunik”.

Tassa asu aningaasaqarnermik sectori aqutissiuunniartigu uumallu siunnersuutitsialaap tassunga alloriarneq siulleq qulakkeertussaammagu qularata tamakkiisumik siunnersuut taperserlugu ataatsimiititaliamut ingerlaqqinnissaa innersuussutigaarput. Siunnersuuteqartoq qujanaq.

Qujanaq

Per Rosing-Petersen